



O'ZBEKISTON RESPUBLIKASI VAZIRLAR MAHKAMASINING QARORI

20 22 yil « 31 » avgust

№ 481

Toshkent sh.

Хайвонларнинг ўта хавfli юқумли касалликларига қарши вакцинация тадбирларини ўтказиш тартиби тўғрисидаги низомни тасдиқлаш ҳақида

Ўзбекистон Республикаси Президентининг “Ўзбекистон Республикасининг “2022 йил учун Ўзбекистон Республикасининг Давлат бюджети тўғрисида”ги Қонуни ижросини таъминлаш чора-тадбирлари тўғрисида” 2021 йил 30 декабрдаги ПҚ–73-сон қарорига мувофиқ, шунингдек, хайвонларнинг ўта хавfli юқумли касалликларига қарши вакцинация тадбирларини ўтказиш тизимини такомиллаштириш ҳамда вакцинация жараёнларини тўлиқ рақамлаштириш орқали соҳада шаффофликни таъминлаш мақсадида Вазирлар Маҳкамаси **қарор қилади:**

1. Ўзбекистон Республикаси Президентининг 2021 йил 30 декабрдаги ПҚ–73-сон қарори билан тасдиқланган Ўзбекистон Республикаси Давлат бюджетининг барқарорлигини таъминлаш ва харажатларнинг самарадорлигини ошириш бўйича “йўл харитаси”да хайвонларнинг ўта хавfli юқумли касалликларига қарши вакцинация тадбирларини ўтказиш ҳамда замонавий ва шаффоф механизмлар асосида молиялаштиришни назарда тутувчи янги тизим жорий этилиши белгиланганлиги маълумот учун қабул қилинсин.

2. Қуйидагиларни назарда тутувчи **Хайвонларнинг ўта хавfli юқумли касалликларига қарши вакцинация тадбирларини ўтказиш тартиби тўғрисидаги низом** (кейинги ўринларда – Низом) иловага мувофиқ тасдиқлансин:

хайвонларнинг ўта хавfli юқумли касалликларига қарши вакцинация тадбирларини белгиланган тартибда давлат рўйхатидан ўтказилган ва фойдаланиш учун рухсат этилган вакциналар билан ўтказиш;

вакцинация тадбирларини ўтказиш ва мазкур жараённи давлат ветеринария хизмати томонидан мониторинг қилиб бориш;

вакцинация тадбирларини ҳар бир туман (шаҳар)да махсус эмлаш гуруҳлари томонидан клиник жиҳатдан соғлом хайвонларда ўтказиш;

вакциналарни ҳар йили шакллантириладиган рўйхат асосида хайвон турлари ва вакциналар қўлланадиган худудлар бўйича белгиланган миқдорда Ўзбекистон Республикаси Давлат бюджети маблағлари ҳисобидан харид қилиш ҳамда уларнинг ҳисобини юритиш тартиби.

3. Ўзбекистон Республикаси Ветеринария ва чорвачиликни ривожлантириш давлат қўмитаси:

икки ой муддатда Бутунжаҳон ҳайвонлар соғлиғини ҳимоя қилиш ташкилоти талаблари ҳамда унга аъзо бўлган хорижий давлатлар тажрибаси асосида ҳайвонларнинг ўта хавфли юқумли касалликларига қарши вакцинация тадбирларини ўтказиш бўйича тегишли йўриқномаларни ишлаб чиқсин ва белгиланган тартибда тасдиқласин;

2022–2024 йилларда халқаро ва хорижий молия институтларининг грантлари ҳисобидан давлат ветеринария хизматининг ҳудудий бўлинмалари моддий-техника базасини мустаҳкамлаш ҳамда зарур жиҳоз ва техникаларни харид қилиш ишларини амалга оширсин.

4. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари давлат ветеринария хизмати томонидан ҳайвонларнинг ўта хавфли юқумли касалликларига қарши вакцинация тадбирларининг ташкил этилишида ҳар томонлама амалий ёрдам кўрсатсин.

5. Ўзбекистон Республикаси Ветеринария ва чорвачиликни ривожлантириш давлат қўмитаси манфаатдор вазирликлар ва идоралар билан биргаликда ўзлари қабул қилган норматив-ҳуқуқий ҳужжатларни **бир ой муддатда** ушбу қарорга мувофиқлаштирсин.

6. Мазкур қарорнинг бажарилишини назорат қилиш Ўзбекистон Республикаси Бош вазирининг аграр ва озиқ-овқат соҳаларини ривожлантириш масалалари бўйича ўринбосари Ш.М. Ғаниев ҳамда Ўзбекистон Республикаси Ветеринария ва чорвачиликни ривожлантириш давлат қўмитаси раиси Б.Т. Норқобилов зиммасига юклансин.

Ўзбекистон Республикасининг
Бош вазири



А. Арипов

Вазирлар Маҳкамасининг
2022 йил “31” августдаги 481-сон қарорига
илова

Хайвонларнинг ўта хавфли юқумли касалликларига қарши вакцинация тадбирларини ўтказиш тартиби тўғрисида НИЗОМ

1-боб. Умумий қоидалар

1. Мазкур Низом давлат, идоравий ва ишлаб чиқаришдаги ветеринария хизматлари томонидан хайвонларнинг ўта хавфли юқумли касалликларига қарши вакцинация тадбирларини (кейинги ўринларда – вакцинация тадбирлари) ўтказиш ва молиялаштиришни замонавий ва шаффоф механизмлар асосида амалга ошириш тартибини белгилайди.

2. Ушбу Низомда қуйидаги асосий тушунчалар қўлланилади:

вакцина – организмда маълум бир антигенга қарши иммунитет ҳосил бўлишини таъминловчи биологик препарат;

вакцинация тадбирлари – эпизоотиянинг олдини олишга, уни аниқлашга ёки тугатишга доир ташкилий ва махсус ветеринария тадбирлари тизими;

ветеринария – хайвонларнинг ҳаёти ва соғлиғи муҳофаза қилиниши, хайвонлар касалликлари пайдо бўлиши тарқалишининг олдини олиш ва уларни тугатишни, аҳолини хайвонлар ва одам учун умумий бўлган касалликлардан муҳофаза қилиш, Ўзбекистон Республикаси ҳудудини хайвонларнинг юқумли касалликлари олиб кирилишидан муҳофаза қилиш, хайвонларга ветеринария хизмати кўрсатилиши, шунингдек, Ўзбекистон Республикаси ҳудудининг ветеринария осойишталигини, давлат ветеринария хизмати назорати остидаги товарларнинг ветеринария, ветеринария-санитария хавфсизлигини таъминлашга қаратилган илмий ва амалий фаолият соҳаси;

ветеринария осойишталиги – хайвонларнинг соғлиғига салбий омилларнинг зарарли таъсирлари, эпизоотия мавжуд бўлмаган, шунингдек, хайвонларнинг яшаши учун қулай шарт-шароитлар таъминланадиган ҳолат;

эпизоотия – тегишли ҳудудда хайвонларнинг ўта хавфли ва бошқа юқумли касалликлари тарқалиши;

эпизоотияга қарши тадбирлар – эпизоотиянинг олдини олиш, уни аниқлаш ёки тугатишга доир ташкилий ва махсус ветеринария тадбирлари тизими;

хайвон – юридик ва жисмоний шахсларга тегишли бўлган қорамол, қўй, эчки, от, туя, эшак, ит, мушук, чўчқа, парранда, балиқ, асалари, ёввойи хайвонлар, хайвонот боғи ва цирк хайвонлари;

хайвонларнинг юқумли касалликлари – хайвонларга касалликларнинг қўзғатувчилари таъсири сабабли пайдо бўладиган, тарқалиш ҳамда бошқа хайвонлар ва одамга ўтиш эҳтимоли мавжуд бўлган касалликлар.

3. Вакцинация тадбирлари мулкчилик шаклидан қатъи назар барча юридик ва жисмоний шахсларга тегишли хайвонларда ўтказилади.

4. Хайвонларнинг ўта хавфли юқумли касалликларига қарши вакцинация тадбирлари ушбу Низомга иловада келтирилган схемада белгиланган тартибда ўтказилади.

2-боб. Вакцинация тадбирларини ўтказиш тартиби

5. Вакцинация тадбирларини ўтказишнинг асосий мезони мониторинг маълумотлари асосида Ўзбекистон Республикаси Ветеринария ва чорвачиликни ривожлантириш давлат қўмитаси (кейинги ўринларда – Қўмита) томонидан ҳар йили 1 октябрга қадар ишлаб чиқилган прогнозга асосланади.

6. Вакцинация тадбирларини ўтказишда жисмоний ва юридик шахслар, давлат бошқаруви органлари томонидан тақдим этилган маълумотлар ҳам ҳисобга олинади.

7. Қўмита ветеринария осойишталигини таъминлашда хайвонларнинг юқумли касалликларини ўз вақтида аниқлаш, уларга ташхис қўйиш ва улар тарқалишининг олдини олишга доир эпизоотияга қарши тадбирлар бўйича доимий равишда мониторинг юритади.

8. Вакцинация тадбирлари маҳаллий ва хорижда ишлаб чиқарилган, фойдаланиш бўйича қўлланмага мувофиқ белгиланган тартибда давлат рўйхатидан ўтказилган ва фойдаланиш учун рухсат этилган вакциналар билан ўтказилади.

9. Қўмита эпизоотия бўйича тизимли мониторинг натижаларига асосланиб, маҳаллий ижро этувчи ҳокимият органларига ҳудудларни ўрганиш ва эпизоотияга қарши курашиш чораларини кўриш зарурлиги тўғрисида тезкор хабар беради.

10. Вакцинация тадбирлари Қўмита томонидан тасдиқланган хайвонларнинг ўта хавфли юқумли касалликларига қарши курашиш тадбирлари бўйича йўриқномага мувофиқ ўтказилади.

11. Қўмита, Қорақалпоғистон Республикаси Ветеринария ва чорвачиликни ривожлантириш қўмитаси, вилоятлар ва Тошкент шаҳар ветеринария ва чорвачиликни ривожлантириш бошқармалари (кейинги ўринларда – ҳудудий бошқармалар) ва туманлар (шаҳарлар) ветеринария ва чорвачиликни ривожлантириш бўлимлари (кейинги ўринларда – туман (шаҳар) бўлимлари) вакцинация тадбирларининг ўтказилишини назорат қилади.

12. Мониторинг олиб бориш учун юқумли касалликларнинг пайдо бўлиши, тарқалиши ва уларни йўқотиш бўйича маълумотлардан (носоғлом

худуднинг географик жойлашуви, юқумли касалликларнинг ўчоғи ва ўлган ҳайвонларнинг сони, лаборатория–экспертиза хулосаси ва бошқалар) фойдаланилади. Ушбу маълумотлар белгиланган тартибда расмий ҳисоботлардан олинади.

13. Маълумотларнинг бир қисми ўрганилаётган худудни тўғридан-тўғри кузатиш, текшириш, шунингдек, эпизоотик текширув орқали олинади.

3-боб. Вакцинация тадбирларини ўтказишда мониторинг юритиш тартиби

14. Қўмита ва унинг худудий бошқармалари ҳамда туман (шаҳар) бўлимлари вакцинация тадбирларининг доимий равишда мониторингини юритиб боради.

15. Мониторинг эпизоотик носоғлом худудлар тўғрисидаги маълумотларини тўплаш, клиник, патологоанатомик ва лаборатория текширувлар ўтказиш, касалланиш динамикаси, ҳайвонларни боқиш ва озиқлантириш, чорвачиликнинг ветеринария-санитария ҳолати, ветеринария хизматининг сифат даражаси ҳамда эпизоотик ўчоқни кузатиш ҳамда бошқа усуллар ёрдамида олинган маълумотларни баҳолаш орқали ҳам юритилади.

16. Мониторинг давомида мавжуд вазият аниқланади, эпизоотик ўчоқлар мониторинг қилинади ва олинган маълумотлар баҳолашиб, зарур тавсиялар ишлаб чиқилади.

17. Мониторинг натижаларига кўра аниқланган камчиликларни бартараф этиш юзасидан бажарилиши мажбурий бўлган кўрсатмалар бўйича вакцинация тадбирлари ўтказилади ҳамда мунтазам назорат ўрнатилади.

4-боб. Вакцинация тадбирларини ўтказиш мезонлари

18. Вакцинация тадбирлари клиник текширувлардан ўтган соғлом ҳайвонларда ўтказилади.

19. Агар ҳайвон касал бўлса ёки жарроҳлик амалиёти ўтказилган бўлса, вакцинация ушбу ҳайвон тўлиқ тузалгунига қадар кечиктирилиши мумкин.

20. Вакцинация тадбирлари вакциналар сақланадиган музлаткич, мутахассис иш столи, ҳайвонларни маҳкамлаш столи, асбоблар ва дори-дармонлар учун махсус шкафлар, стерилизатор билан жиҳозланган алоҳида хоналардан иборат ветеринария клиникаларида ўтказилиши ҳамда биноларнинг деворлари ҳамда поллари тозалаш ва дезинфекциялаш осон бўлган материаллар билан қопланган бўлиши керак.

21. Вакцинация тадбирлари ҳар бир туман (шаҳар)да ветеринария ходимлари томонидан ўтказилади.

22. Вакцинани фойдаланишга бериш даврида вакцинани қўллаш билан шуғулланадиган ветеринария ходимларига тегишли тушунтиришлар бериб борилади.

5-боб. Вакциналарни харид қилиш тартиби

23. Қўмита томонидан ўта юқумли касалликларнинг тарқалиш ҳолатидан ҳамда кўшни мамлакатлар билан чегарадош ҳудудларда ушбу мамлакатлар томонидан расмий равишда эълон қилинган касаллик турларидан келиб чиқиб, келгуси йил учун харид қилинадиган вакциналар рўйхати ҳамда миқдори ҳайвонлар турлари, қўлланадиган ҳудудлар бўйича календарь йилнинг 1 июнига қадар аниқланади.

24. Харид қилинадиган вакциналарнинг турлари ва миқдоридан ҳамда уларнинг кутилаётган баҳосидан келиб чиқиб, кейинги йил Давлат бюджети параметрларида назарда тутилиши зарур бўлган маблағ ҳисоб-китоб қилинади.

25. Қўмита томонидан вакциналарни харид қилиш учун талаб этиладиган маблағ ҳисоб-китоби асосида қонунчиликда белгиланган муддатларда Ўзбекистон Республикаси Молия вазирлигига бюджет сўрови киритилади.

26. Вакциналарни харид қилишда шаффофликни таъминлаш мақсадида уларни ишлаб чиқарувчининг ёки препаратнинг аниқ номи кўрсатилишига йўл қўйилмайди ва фақат препаратнинг таъсир этувчи моддаси номи кўрсатилади.

27. Вакциналар “Давлат харидлари тўғрисида”ги Ўзбекистон Республикаси Қонуни талаблари асосида харид қилинади.

6-боб. Вакциналардан фойдаланиш ҳисобини юритиш

28. Вакцина ҳар бир ҳудудий бошқарма ва туман (шаҳар) бўлимининг махсус жиҳозланган омборларида (шкаф ва музлаткичларда) сақланади.

29. Қўмита, Қорақалпоғистон Республикаси Ветеринария ва чорвачиликни ривожлантириш қўмитаси, ҳудудий бошқармалар ва туман (шаҳар) бўлимлари томонидан сарфланган ҳар бир препарат бўйича ҳисобот электрон дастурда юритилади ҳамда унда препарат қўлланилган ҳайвон эгаси, ҳайвон тури, қўлланилган препарат миқдори, санаси бўйича маълумотлар тўлиқ акс эттирилади.

30. Вакциналарни қўллаш такрорийлиги мазкур препаратларни қўллаш бўйича белгиланган меъёрдан ортишига йўл қўйилмайди.

7-боб. Яқунловчи қоида

31. Ушбу Низом қоидалари бузилишида айбдор бўлган шахслар қонунчилик ҳужжатларига мувофиқ жавоб берадилар.

Ҳайвонларнинг ўта хавфли юқумли касалликларига қарши вакцинация тадбирларини ўтказиш тартиби тўғрисидаги низомга илова

Ҳайвонларнинг ўта хавфли юқумли касалликларига қарши вакцинация тадбирларини ўтказиш СХЕМАСИ

Босқичлар	Субъектлар	Чора-тадбирлар	Муддатлар
1-босқич	Ветеринария ва чорвачиликни ривожлантириш давлат қўмитаси ва унинг ҳудудий бошқармалари ва туман (шаҳар) бўлимлари	Вакцинация тадбирларини мониторинг маълумотлари асосида ишлаб чиқилган прогнозга асосан ўтказиш.	Ҳар йили 1 октябрга қадар
2-босқич	Ветеринария ва чорвачиликни ривожлантириш давлат қўмитаси	Вакцинация тадбирларини ўтказишда жисмоний ва юридик шахслар, давлат бошқаруви органлари томонидан маълумотлар тақдим этилиши.	Доимий равишда
3-босқич	Ветеринария ва чорвачиликни ривожлантириш давлат қўмитаси ва унинг ҳудудий бошқармалари ва туман (шаҳар) бўлимлари	Ветеринария осойишталикни таъминлашда ҳайвонларнинг юқумли касалликларини ўз вақтида аниқлаш, уларга ташхис қўйиш ва тарқалишининг олдини олишга доир эпизоотияга қарши тадбирлар бўйича мониторинг хулосаларини тақдим этиш.	Доимий равишда, ҳар ойнинг якунида
4-босқич	Ветеринария ва чорвачиликни ривожлантириш давлат қўмитаси	Эпизоотия бўйича тизимли мониторинг натижаларига асосланиб маҳаллий ижро этувчи ҳокимият органларига ҳудудларни ўрганиш ва эпизоотияга қарши курашиш чораларини кўриш зарурлиги тўғрисида тезкор хабар бериб бориш.	Доимий равишда
5-босқич	Ветеринария ва чорвачиликни ривожлантириш давлат қўмитаси ва унинг ҳудудий бошқармалари ва туман (шаҳар) бўлимлари	Вакцинация тадбирлари ўтказилишини назорат қилиш.	Доимий равишда

6-босқич	туман (шаҳар) бўлимнинг ветеринар ходимлари (махсус эмлаш гуруҳлари)	Вакцинация тадбирларини ҳар бир ҳудудда ўтказиш.	Ҳар йили тасдиқланадиган касалликларга қарши курашиш тадбирлари бўйича йўриқномага мувофиқ
7-босқич	Ветеринария ва чорвачиликни ривожлантириш давлат қўмитасининг ҳудудий бошқармалари ва туман (шаҳар) бўлимлари	Ўтказилган вакцинация тадбирлари бўйича ҳисоботни Қўмига тақдим этиш.	Тадбирлар яқуни бўйича
8-босқич	Ветеринария ва чорвачиликни ривожлантириш давлат қўмитасининг ҳудудий бошқармалари ва туман (шаҳар) бўлимлари	Ўта юқумли касалликларнинг тарқалиш ҳолатидан келиб чиқиб келгуси йил учун харид қилинадиган вакциналар миқдори тўғрисидаги маълумотларни Қўмига тақдим этиш.	Ҳар йил 1 июнга қадар

